

施叔范遺詩

冷泉亭（一九三一年）

岚烟湿树水生寒，负手空潭自耐看，不比人心冷还热，为云为雨起波澜。

哭祸七章（一九三三年）

一九三三年秋，在沪与邓粪翁（散木），火雪明，沈桢等结“哭社”吟诗。会火雪明值社，邮寄课卷。余姚县国民党疑是异党集会，星夜派省防军下乡索捕，适余以事留县，得免逮系。越宿谒县具陈。

纪元廿二年，九月三十夜，官书索党人，缇骑荒村下，长吏诱启门，从卒进如泻，斗室成敌垒，分堵飞电快，不许妇孺啼，狂摔吾父骂，时清渠好哭，此罪已不赦，况友火雪明，赤色官最怕，大举反意明，六集邑庙借，呼喝起银铛，惊犬吠旁舍。

吾父病却曲，鞅对不成词，盲母拭泪听，一听一呼儿，曩说妻胆壮，亦已灯倒持，呜呼吏役威，今日方确知。

吏大喝曰搜，奉命何捷速，鼠矢倾篋底，败絮吐床角，穷不如古塚，了无金可摸，赫然更怒眉，加等真堪戮，忽捡数首诗，其意颇有得，诘屈复聱牙，摇头不可续，摺叠姑怀归，待与长官读。

国家养吏胥，月给有多寡，综此一夕计，不在百金下，昔者正吕览，一字金千假，较彼原未足，官已出重价。

吏去众魂苏，吾妻翻悸极，举头望悬筐，似闻隐隐泣，因忆憨丈夫，得句辄投入，古墨示妖声，定多凶少吉，灵堂爆花火，一炬清余孽，那知片片灰，尽是丝丝血，其意良可感，其愚不可及。

我归自茫茫，入门穷应对，惊眸萃一身，讶此长幼会，辟耳或把臂，都说心胆碎，此乡不可居，盍速遯海外，穷究悉颠末，气奔肺腑溃，白日丽青天，忽交嬴政代，诘朝绝裾去，跼颈阶下待。

昂头见县官，双拳当胸抱，获罪来请刑，揭首六街告，官容果慈祥，徐云吾了了，不过诗铸钟，用意太玄妙，再查氏书上，火姓近臆造，民牧未安民，岂敢良民扰，还汝双琅玕，去去勿复道，归来怨家人，谰说虚惊饱。

玉皇山

幽花野草是仙鬟，紫石红泥十种丹，薄福难为香案吏，天风吹上又吹还。

慈云岭

巢柯分暝与烟岚，疲脚行来一倚栏，道上痴儿归未得，慈云岭上乳鸟还。

虫声

露湿蛛丝月堕杯，哀风嗽齿四围开，道上新署秋虫长，尔许吟魂点卯来。

蜘蛛

临风续续吐檐角，负日蠕蠕窥瓦沟，倾腹丝纶酬一饱，怜渠辛苦嚼蝇头。

龙井

野荠麦花拂袖香，天风吹雪下羊肠，背人小试英雄手，驮得青山障夕阳。

送许重平先生归富阳

老挟奇才侧百僚，秋风忽送马蹄骄，微官得逐还乡愿，说与前贤略解嘲。
归兮归兮白云边，欲言无言更惘然，江神莫扇东风急，为我稍船上濫船。
夜凉犹挟风雷起，老笔如人气最豪，官舍吟阑怀小友，也须乘兴下江潮。

与唐倬同饮

虽无烁骨唐衢泪，话到求田意已销，入市黄金都化虎，蠕肠绿蚁各为潮。何
年江竹擎君手，几见山薇赎吏腰，窥户输地屠贩子，两街鼾答马蹄骄。

重抵抗

芦槎浮出鱼儿窟，柳絮风便小吏簪，合辙桑花黄一尺，扑襟丝雨翠千层，
无穷世虑粘棒水，小识宦情豆架藤，向晚下车先障扇，也知老女怕红灯。

幽心

幽心铸为剑，锋棱自镂骨，繁屑扬胸隘，吐之汨汨出，岁无皎洁光，颇见丝丝血，
吾闻小有才，尚死盆成括，道旁横废木，知几且自斫，生殒亦多门，醇酒先腐膈，
诗毒猛于鸩，复使寸寸烁。

赠许重平先生

我生违俗以诗穷，我寄深哀以酒雄，不屑与言成冷客，竟能放眼得癯翁。为
犹贤已聊呼白，未许忘情一比红。（下阙）

过徐志摩墓 硃石东山

乌啼墓门秋，金闺歌舞夜，吁嗟美人恩，头颅黄金买。

秋雪庵

秋雪飞空尽是愁，年年溪上有深秋，卖书乞换茭芦住，又恐花光白上头。

西施祠

辛苦筹资入越来，穷怀不为女儿开，香花供养蒲团泣，绿剌升沉又一哀。（小
沙弥坐蒲团啜泣）

别五洩寺

乞慈多献数黄金，犹倚危灯肃戒心。一梦斋堂僧眼碧，寺钟未动出松阴。

吼山王干青

（二三年，王原往烟萝洞，后为有力者篡去，挈眷移居，赠人残书。）
餐薇饮水王跛叟，嘲弄仙灵或不如，谁分曹山山下路，向人垂泪赠残书。

过钓台 在桐庐富春江畔，为严子陵垂钓处

何处桃源觅古欢。谁容枕水蕨为餐。东台黄竹西台泪，今日安排恐两难。
（以上一九三三年作）

除夜车过江山

金绳塔上月如镰，又见仙霞拱眼前，一觉江郎山下梦，旅灯红了已明年。

登天门山

人间无往蹈天门，非乞杳茫玉帝恩，日暮或许山鬼遇，不论词魄与诗魂。

与（郁）达夫、（陈）紫荷、（王）薇子饮市楼时达夫撰樊榭说

徽阳掩屋山，衙坐如望赦，忽闻隼侣招，电掣双轮快，闯筵倒酒浆，问讯各不暇，紫荷矜冶人，诗癯气自霸，薇子八闽归，得句颇如画，更有子郁子，东南崛一怪，文字久无灵，而彼独能卖，凉秋发兴奇，湖山忽命驾，落叶迷荒坟，秋山何处拜，谓将泛苕溪，碧浪红帆挂，月上拟小红，白石仿樊榭，香火分诗姬，秋雪年年大，究彼临安志，琴操漏未写（郁达夫《琴操墓》诗：“如何百卷临安志，不记琴操一段情”），道我饮茶歌，异想来天外（夏自怡精究茗饮，余诗有：“只恐异代翻酒诰，大书某某茶亡国”句）。楼下万轮蹄，楼头太古话，酒阑各扬长，金吾正肃戒。

自云楼登真际寺

我岂山灵之骄子，我真胁底生双翼，一气穿山八百蹬，转陋诸佛下界滞，与云上浮事大奇，俛临青苍疑无地，危亭林海开划豁，半壁江山顿失蔽，御风更入云中寺，不见人烟但云气，绿琉璃放舍利光，大将军树精灵闭。

年来

岂为看山浪出门，长时风露食天恩，年来只觉江湖小，不着啼痕着酒痕。

冰壶洞

已探双龙奇，更抉冰壶怪，张吻山之腰，容身尚觉隘，援所縋杳暝，上系树根大。泥松不任趾，拳石滚滚泻，此际呼吸存，随时可物化。忽觉漏天光，白龙尾乱摆。洞深已见底，龙变不胜骇。穿天穴山来，雪崩而珠洒，悬空十丈高，周绕百步外，衣上烟雾生，身边冰河解，吾生叹观止，出入两世界。

宿横峰

夕眠横峰道，河灯闪绿波，深宵还洗剑，借月来收禾。地瘠犬声壮，屋疏碛影多，不须提往事，吾泪已滂沱。

武松墓

吾家旧读齐谐志，豆架秋灯写子灵，百七鬼雄常夜哭，都头墓上勒丹书。

烛溪湖

邻家乞取桃花酿，航渡买归刀白鱼，酒醒不知何世界，山虫枝鸟念奇书。山纳晓风翻碧浪，水薰残照湿燕支，可怜田谷庵僧话，头白无人题好诗。

古漪园

模糊人影织长廊，兵火三朝渐渐荒，树亦吁风多感慨，鸦如为客说沧桑。一壶生气蓼花紫，半尺微阳芦水黄。世乱何知书法古，听人轻薄说香光。

泛湖

萧娘剥豆谢娘灯，往事流灵叶叶凝，孟夏无花尘气恶，中年拾梦酒杯冰。阅人老树史全部，浮水孤山眉半稜，向晚移舟何所适，一帘浩荡暝烟升。

过义乌

灯痕挂鬓酒痕干，薄薄灵襟拒晓寒，高树只遮云一角，黄溪城上数星残。

缙（云）丽（水）道中

破衣补缀似鱼鳞，芋薯空时腹自扞，我怪青山非饭甑，只蒸云水饱游人。

石门洞大瀑

灵运山贼耳，夫岂英雄手，文成虽居相，亦落帝王后，石门野人居，括苍渔樵藪，飞泉四十丈，六时发清吼。吾闻雪窦溪，荒落浙之右，冠盖忽云集，乾坤宁新剖？一水有不平，归来狂呼酒。

诸暨五洩瀑

何神横蹈决天河？何年疏引演五洩？我来直趋东龙潭，雪涛银花正脰沓，松颠溅沫如车轮，下捣地肺地为裂，四洩雷訇悬崖下，伏崖俯视身倒挂，是猿是蛇我非我，风耶雨耶昆阳瓦。万一失手坠崖死，荒山野鬼何姓氏？知我者谁刘龙子。

西施祠

水碧沙青映古祠，英雄心肺女儿姿，廿年啼笑深宫里，胜似沼吴十万师。敌国阴谋久已闻，微时不废浣纱勤，山棚流出风云气，分取種蠡一半勋。

旅感

白水青芦渺渺愁，不关江上哭灵修，蓼虫清苦商船稳，一例凉灯泊过秋。

苏小墓

黄金都买嵯峨石，掩闭香泥气不灵，还说钱塘文物盛，无人布施墓头青。

中秋泛南湖

齿牙垂惜红虾老，肺腑岂堪白露流，多谢暝烟收月廊，清光绕上腐儒头。

寄《闲话扬州》者

袖手官阶同匿笑，脱身诗讖敢微嗔，危时命比玄蝉薄，闲话丝抽紫茧新。

出吴淞口

子夜避喧意已微，共鱼吞月淡忘归，萤穿白苇馥凉气，潮汨黄星破静机，大海不随兵劫变，颓关谁借箸谋非，野人无位此荒坐，味景看天露满衣。

读山海经

海阁霜灯物物幽，鸿荒图说注清眸，奇哀结舌蛇吞象，故事伤心鹄让鸠，六道何曾关劫数，诸天原不讲恩仇，微闻太学上书急，难道陈东独解羞。

京沪学生雪夜赴南京请愿

大雪飞轮五夜开，春婆扰扰梦初回，蕴愁肺腑将生角，流涕河山欲化灰。

金刀

金刀无兮岁星催，草野忧时不稷灾，大半光阴消薄酒，无多意气掣残雷。青天苦语蝉声老，白月危尘马足哀，道我忘家还有梦，可堪袖地入蓬莱。

夜卧（又题夜坐）

灭烛卧凉楼市园，万虫不碍豆篱宽，三年风露愁今夜，六月江湖了冷官，俯仰羞看高树影，行藏懒捡野人冠，疗饥新法我能说，大月繁星手自搏。

王四酒家

入金离离豆荚繁，火工食客两无言，开窗赌饮青松大，连累幽禽醉欲翻。浮杯村酿如花白，没骨蒸鸡比柳黄，但到日斜听负鼓，江南此是赵家庄。（以上一九三五年作）

南湖棹歌

水风泛树正萧萧，如此恬湖有暮潮，白发阿娘怜作力，还须载客过湖桥。侬家柔橹即黄金，十月芦花寒作衾，三十六湾都泊遍，说来谁要客关心。南湖水产十分贱，剥与老饕指不胜，看惯菱花开复谢，可怜无福吃青菱。

白露（又题偶成）

饥龙嘘月笑凉秋，闲煞明珠海上浮，白露三升流肺腑，莫教凝结到清愁。

庐山与人谣

山中白云生，山下暮炊熟。为有看云人，一夏生事足。凉风恩到骨，莫向地上吹，吹时江湖冷，孰个上山来。愿山如春笋，抽长殊未已，一步一黄金，驮入青云里。

海东（又题决战）

海东十万鸬鹚面，齐摄罡风止国门，不尽荒陵轩后泪，无多落日蔡州痕。中原礼让过三舍，今日存亡决两言，休薄当年韩侂胄，也曾江上出征幡。

黄山（又题游黄山）

庐阜似高人，黄山如剑客，武怒掣紫电，匡君倘失色，截地维天纲，万峰只一石，白日转山腰，意者恐被削。我来正炎荒，四顾江湖灼，手扞青鸾尾，身浴朱砂赤，猱升揽天都，松颠苔盈尺，裂石不容根，遂呈此倒植。山高云成海，风卷折毛发，树树无全枝，半杯烈风斫，使无练在手，怎免身簸掷。晚宿文殊院，思之犹动魄，平地蝉怒号，山眠衾似铁，四时长不夏，亘古荒历日。

作诗

作诗如练兵，字字红抹额，决荡去陈言，犹诸挞蛮貊，句俗仅伤雅，卒急恐不国，如何善诗者，薄饮无肉食。

佚题

残岁倒樽无好绪，清时惜墨尚危机，书生白面襟魂薄，巫祝朱轩目语稀。四座不官真有道，踉跄各趁市灯归。

（以上一九三六年作）

淮南道中

老妇捆芦犊挽车，青天不雨下黄沙，淮南五月残冬景，大麦稀疏似野花。

过徐州

霸气诗心日夜浮，云龙九里与黄楼，街头白粥知民力，树上乌鸦送旅愁。此地谈兵烽火集，当年泛客水灯幽。驱车我自抚髯影，又听河声入海流。

曲阜

高处陂陀浅处洼，更比徐淮地力差，麦饼胡葱关礼义，骡纲马足各尘沙。幽鸣古鸟逾千岁，聚族名城盛两家。（城中多孔孟二姓）不少衣冠清墓草，颓垣却放野棠花）

登泰山玉皇顶

稽古东封尚有文，玉皇钟磬下方闻，谁能大胆题诗句？我独搔头望海云！诸夏真将论作贼，万松何不化为军？问天苍莽无消息，但见黄流泻夕曛。

抵北京城

苍髯百里野风吹，屑涕下车又一悲，独客抬眸成怅惘，斜阳负郭入虚危。曼歌丁壮街头坐，无力星辰树杪垂，咫尺丰台骄月上，夜深更向女墙窥。

北海子

病流枯苗两目昏，北游随处减清樽。孤城莽宕谁堪托？大月荒寒不可吞。历劫稠桑青入梦，堕怀残塔白无痕，前朝梳洗流金粉，断烂尘尘未易论。

登居庸关八达岭

灯火载人闭白日，雷霆曳轂穿重冈，出关沙影驼拳活，蹶足云堆鸟道长。秦汉毅魂此酣战，羯胡余浸要严防，如河边戍至今废，匹马萧萧破大荒。

迎七君子出狱

抗言敢上断头台，出狱真同却敌回，钗剑刚离诸厄苦，虫沙已是一轮回。中朝狎客初醒酒，大劫渔阳又化灰。未死倘宏根本计，如今渐说要人才。

原诗二首，其二仅存中二联及末句：“……诸君原部矜微命，上相何曾定大患。原上尸摊红抹额，江南日落紫金山。……两字攘夷国脉关。”

云龙山吊范增墓

不薄重瞳爱范增，黄茅冈下醉呼灯，拔山盖世英雄主，肯向胡儿和白登！

丁丑朱夏二生字之曰桑

连岁忧时不穰灾，东南浩劫入轮回，生丁世乱汝何识，壮逐兵荒吾自哀。薄福难清诗酒债，寒门岂有栋梁材？力田大计从今拟，头白看儿驱犊回。

夜坐（又题回乡 八一三战作）

悄离兵火及新秋，危坐虚簷露自流，一发凉兮星汉影，孤怀冥接草虫愁。号天清响皆饥象，在野老农未预谋。脱粟恐乖来日愿，搏云煮月梦悠悠。

偕陈娴陈姍韵庭登胡公岩

非关劫剧挹萧寥，未恐名山霸气消，自拂苍髯看落日，却烦红袖话前朝。人间家祭何尝废，地下鬼雄或可招，说与两城佳子弟，哪能垂手听江湖。

*胡公岩，在余姚县城之北的胜归山上。

乐府三首

不抵抗

渡未毕，尔莫击。敌方阵，尔姑静。宋襄之不可及，今日疆吏同一辙，呜呼！三字沉半壁。

沪壖行

三边豚儿沦东北，五羊壮士能杀敌。孤军苦战后无继，力尽血殚焦土弃，剩得春江呜咽水，逃者高官战者罚。呜呼！主庙堂者原是卖国贼。

*张学良将军是按国民党最高当局密令弃守东北的事实，当时尚未揭露。本诗第一句乃未明真相而发。

卢沟桥

卢沟风萧萧，卢沟月高高。敌来窥兮万霹雳，霍霍大刀出，退一步者膏尔刀，死则死在卢沟桥。心光赤，月光黄，惟天鉴之告四方！

（以上一九三七年作）

自怜

自怜树底婆娑影，谁漆人间突兀头？乙乙虫弦经露湿，泠泠蟾魄逐云幽。

登陆放翁快阁

前朝隐痛说其亡，家祭何年水阁荒，词客东来刚孟夏，中原北望又斜阳。僧清句苦酬忠爱，冠老地偏悯稻粱。莫道稽山终净土，分明偷息吊龟堂。

宿平水寿圣寺

古寺灯悬诗胆赤，荒山叶点酒襟黄，吾曹一诺天能鉴，此夜三人世已忘。

哭王尘芜

灵霍哀萤入屋飞，故人面目见依稀。一樽倒罢乾坤毁，残梦啼回气息微。壮不提刀终玩寇，生何如死便忘机，都缘历历前尘在，露白星黄一恸非。

危时觅句万哀攒，避地无如血已殚，病势知随兵势剧，墨痕终殉酒痕干。堂堂短梦完忠爱，渺渺来缘蚀肺肝，阖眼海门秋草碧，每乘薄电叩桐棺。

龙井

坐啜清茶午两催，石根深处起轻雷，风篁岭矮空青缺，一片湖烟白上来。

断句

但能诸将拼焦土，岂有吾民不毁家。也知一饭关忠爱，流涕当筵大有人。（诗灯阁）

（以上一九三八年作）

上岙湖

此地有山还世外，要谁流涕望天边？夕阳凝面人初酒，野水浮钟树欲烟。

（一九三九年作）

邑荒赴沪乞榷谢诸友款饮

重来海上知何世？遍握樽前谢故人，异地亦闻禾黍熟，危灯终觉齿牙驯。三年坐卧多烦郁，一市浮沉更苦辛。只有高天青似旧，夜凉携手看星辰。

轮铁差形腰脚健，秋帆渐逼鼓鼙凉，荒田斜日扶丁壮，行道何心乞醉忙。（时日寇攻镇海关）

（以上一九四零年作）

龚翁锄庭前冬青种紫竹

闻说孤儒入海深，龙天消息尚沉沉，三年勒石留兵气，算是东南未了心。惊沙乱扑符离集，冤鸟时啼野史亭，拼忍来宵风露恨，眼前先为哭冬青。

公束端钩招饮酒家

衣上浪花犹未干，驱车先策存心安。萧街卖酒认奇女，五月灯波特地寒。习习青丝上界风，弯弯眉月本相通，竭来秋士一呼白，灯火无情四面红。

喜聚仁过访

压灯大笠流兵气，入室严装带劫灰，一握青霜期后约，墓门挂剑在南雷。

*聚仁：曹聚仁，诗人诗友。

（以上一九四一年流亡前作）

流亡诗草

自序

此非诗也，吐吾孤愤而已。溯自流亡以还，鬓有丝矣，髯已苍矣，子弟之望吾东归者泪亦干矣。然而悠悠之愿未可以期，念此身尚在，此心不死，他日有求吾骸骨者，终当索之于南雷山下焉！虽然吾犹有待也。一九四四年 施叔范

余姚沦陷纪事

狼藉旌旗避地忙，空衙鬼火夜凄凉。麦黄豆熟饱胡马，城破何尝战一场。（时国民党县长为蔡竹屏）

歌唱董逃地不灵，将军独马入云根，万峰天险轻轻掷，一路无人月戍门。（余姚上虞地区指挥官翁光辉策马进入四明山）

义愤如山一死去轻，荒崖茧足请长缨，谁知赤手吞声去，辜负南来子弟兵。（余姚沦陷后，作者同中共地下党员马承烈组织姚北抗日自卫队，率队赴四明山向县长蔡竹屏请缨抗日。但国民党积极反共，消极抗日，不但勒令解散了这支抗日武装，还缴了他们的械。）

从此江城不复青，两三点泪影伶俜，都依红豆山庄活，一夜乌云隐万星。

大岚山卧病

危期妙着仗何人？北望青天万迹陈，一病深山惊落叶，两城八月尚胡尘。黄金散尽丹心腐，骨肉抛残木石亲，如此凉秋如此夜，可堪不语对星辰。

问天只是屈原狂，孱楚哪能有国殇！古恨今愁惟痛哭。荒山古月照流亡。烽磷经露秋逾壮，鸡犬无家劫正长，奚必梦中寻废垒，履边草色有焦黄。

中秋宿嵯县

清光浩荡接汀沙，亭影高寒树影斜，今夜溪山真入画，一楼人物各无家。东来消息心如醉，北望旌旗眼欲花。旧说秋凉归赏月，可怜月满尚天涯。*大岚山：四明山一支脉

佚题

如斗灯花夜抚营，骅刀帕首倍纵横，大岚山草青如昨，应念当年子弟兵。

*本诗系柴子英先生提供。

抵方岩（在永康县境）

稚牛子弟皆星散，独抱痴心走莽尘，此地还留干净土，嗟余早是乱离人。难忘蜡泪流长夜，犹记杨花送暮春，一吏清闲僧亦老，重来何事不伤神。

下兰溪江

窄袖金刀杀贼忙，醒来浩叹卧船舱，桃花水色英雄泪，秋梦荒唐载一江。

过钓台

青山无色水无声，莫问江湖路几程，自倚孤篷挥痛泪，难将往事告先生。棘门草绿兵如鼠，胡马灯红鬼满城，人物已空忠义尽，伶俜一士死还争。

重九谒忠烈祠

琵琶牛酒寸心丹，狂拜忠魂落照间，是处青天撑大树，阳江焦土带残山。千村劫火黄花瘦，九日风尘白帽斑。尚喜衣冠灯影盛，就中野衲更萧闲。

登东天目

高天两泪看苍生，一剑华夷万死争，树挟风云通霸气，山连吴越比长城。新霜稻熟郊原美，野舍芋粗萤火升，避寇得留江右地，忧时差慰庾兰成。

昭明文选楼

谁把萧梁旧梦湿，台城秋柳亦无存。独怜帝子流文采，来向僧楼吊墨痕。词赋于今真莫补，江山异代不同轮，难将万竹化神箭，斜日无言倚寺门。

（自朱陀岭玉雨花桥有银杏数千树，经霜澄黄如海，仆海东人也，对此凄然欲绝。）

西风昨夜送新霜，银杏辞秋叶叶忙，家住海东唯梦列，眼前哪得午潮黄。

雾山寺纪事

一夜霜猿满雾山，灯痕如月泪痕斑，流亡客听流亡曲，痛极转疑在梦间。

督师辅臣史可法印歌

印藏孝丰塘浦王六辰家

洛阳城郭烈火烧，梅花岭上杜鹃拜，昨梦三百年前事，麻衣恸哭事大怪：告我督师留将印，摩挲不妨书生借。得之者谁吴兴周，铭之年月安吉缶。晓踏繁霜走塘浦，叩门狂索四邻诰。晔晔朱文紫电开，浩浩元精笔难画，辅臣八字张天骨，古牙通灵狮能话，答书气压多尔袞，移檄曾慑四镇霸，事虽不成大义存，一洗儒冠被人骂。乾坤易代痛未已，对此忽然襟泪泻，天纵前妖蹴禹图，五年华夷混两戒，处处义师转战酣，报国何尝限草野，春三城破仓皇走，矮屋油灯稚牛夜，我马已黄子弟痛，只欠头颅一割快。感君桓桓更爱士，停车道左接蕴藉：西行去吊万忠魂，得印如见文山带，梦中阁部再叮咛：纵夷即是江山卖。此语胡可腹幽藏，一一铃出国门挂。

再过钓台

闻说家山劫愈深，东归倘得万言陈，船头水石仍严濑，墓下衣冠非汉人，一息微存兵剑气，衰髯乱积道途尘，云天灵鉴风声怒，虚过台前树不春。

泊严（州）东关闻邻舟歌流亡曲

流水霜滩徹夜清，谁能哀怨裹红巾，销魂多少燕支泪，都湿乌篷卧听人。

金华度岁

短髯长剑欲何依，爆竹声繁大雪飞，一士流亡终为国，孤灯啜泣不关饥。初知今夜无家痛，敢说当时避地非，残岁东归归亦客，忍烦店妇浣征衣。

江湖授岁寻常事，襦被金华一惘然。红烛满街非故里，黄狐凭穴忽明年，最怀子弟悲江上，欲见慈亲托梦边，如醉如痴窗外望，夜鸟啼雪亦无眠。

六月间遣义民击杀汉奸卢少川等四名于庵东，日伪悬四千金购吾头，客来追述其事

谁能杀我千金赏，杀贼我已试剑新。失笑腐儒头有价，岂真乱世邑无人？堂堂三户终存楚，耿耿孤怀不帝秦。事业虽虚心自壮，东归誓扫满城尘。

遥祭母亲（金华七宝寺一九四二年正月）

久客接家书，开缄心已跳，初读疑眼花，再读万念了，一恸一呼母，儿犹溺醉饱，不知病何始，不知病中貌，不知临终前，痴儿几声叫，呜呼弥此恨，除非天地倒。

吾母目早盲，今更疽右脚，万苦萃一身，都为忧愤积，但闻儿出亡，不见而之入，如此日摧残，衰年哪能活，吾虽最爱母，间接实手杀，往事诉灵前，隐隐凄白发。

四月江城陷，护粟入深山，会令抚豪侠，风雨下重岚，迂回百廿里，早发夜叩关，入室轻呼母，喜极泪痕斑，抚儿双草履，悯儿多辛艰，语毕推出门，叮咛莫昼还。

端午复上山，胡骑适奔突，严关枯松守，屐痕涌岩谷，带刀管黄金，风露过三宿，头上火雨飞，四面流星绿，维时多流言，谓余已沟壑，诘朝振臂去，义帜

张姚北。

赤脚倾意气，慕义人皆虎，一自四奸诛，谣诼满道路，械隐红梁地，月明荒江槽，母子反以疏，狎与屠狗伍，有时一归省，匆匆亦数语，母意不为然，儿呼胡自苦？吾尝笑谓母，儿实神所护，母最笃信佛，故儿无恐怖。

子弟日以众，苦恨械不足，七月十四日，三度走荒谷，所请虽无多，终胜徒手搏，如何忽中变，留置不果发，上惭黎洲魂，下负父老嘱，事既不可为，吞声上天目，痛哉痛断肠，与母成永诀。

弃母避江右，不孝拼被骂，念念思规复，剖胸心可挂，会当凯歌归，往事从头话，右手提虜头，左手牵胡马，琅琅说与听，任母惊又怕，痴梦结六月，原都烟中画，异日告此意，只凭泪盈把。

母逝在腊尾，儿知己正月，千里寄哀思，古寺借一角，鸡鸣天五更，陪母共残烛，永夜见慈容，时笑时复泣，昔母尝劝饮，今宵儿废酌，痛哉无母人，国破头更白。

抵龙游

春寒结轡向龙洲，布帽披风当敝裘。旧俗已知家祭少，新年翻觉市灯幽。扶残心事看双塔，入梦车尘过数州。赖是邻歌分蜡泪，不然白尽腐儒头。

宿龙游酒家

春风吹得鬓星星，涕泪都曾劫火经，吾眼已红心更苦，四围不是越山青。筏影车声世路长，逝怀流水意茫茫，溪鸦乱点春城墨，画我危楼坐夕阳。

乌石山（为南渡张浚刘锜等题名处，姜白石有诗）

夺得东南半壁回，江山终古仗人才，绿苔冷却燕支字，无复题名宿将来。

余姚沦陷一周年

痛哭哀吟两枉然，欲凭绝食动高天，心伤避地过千里，眼见堕城刚一年，忍死何曾毫末补，余生敢望发肤全！斜阳独立东风急，痴念牛羊上墓田。

山楼

山楼薄醉夜何清，一客无言听论兵，灯下私翻輿地志，只悲无地有州名。齿落髯苍味自谙，奈何情绪托春蚕，狂言难怪陈同甫，未识少陵与剑南。

虫声

一尺灯波数丈澜，楼前草露夜何繁，虫声杂乱忧危重，亦似苍生不择言。

纪事（录三首，日寇袭珍珠港）

乾坤霹雳纪王春，仙府楼船一黍尘，垂死孽龙翻海水，负创天狗犯星辰，危灯绿闪马来岛，焦土红连菲律宾，十二万念无此梦，槟榔树下葬鲛人。

战罢玉龙汗透衣，残鳞败甲祭湘妃，将军三箭黄狐净，兵势连云赤兔飞，击壤饶歌酣草野，出关铜鼓拂旌旗，南荒蛮妇椰阴指，初见中原士马肥。

马不停蹄士不休，堂堂天讨赋同仇，……枉死鬼号湘上月，受降城筑海边秋，五年辛苦繁霜鬓，岂但萧曹尽白头。

客云和哀念慈亲并怀内人

只算夫妻两寡鹄，看来未必故乡还。儿于今日心真死，母在重泉涕莫潜。极痛奚遑问新岁，无能再不恋残山，天涯行脚从兹决，报答慈恩佛火间。

见落梅

梦有忠魂点卯来，醒时更为数花哀，天心倒底怜刚烈，一地春冰葬落梅。

谢韩登安赠印

一腕龙蛇在，我怀亦未驯，刀头天地气，鬓上道途尘。

龙泉访夏承焘

竹荫菇菜荐盘殮，风味如人隼莫论，日午茆檐三四影，不妨微醉看中原。

苔碧泥红艳古城，东风吹树杂花生，了无剑气逼衣履，一郭春流绕市声。

附：洞仙歌（夏承焘）

叔范枉顾，与声越、季思招饮山店，谱洞仙歌记之。

敲门一客，讶须髯如此。来向空山问生死。放长筇一笑，短后衣囊，出照眼，玃珠万字。

牛栏鸡栅畔，醉路相扶，自爱茆檐影三四。巾扇少年游，换了番风，莫重问六桥花事。也不必，长吟五噫歌。嚼满口黄韭，自成宫徵。

客温岭泽国闻家被日伪搜劫，妻携两儿女出奔

舍竹全摧屐齿深，千山万水气萧森，扶携星月如亲见，出没刀兵费远寻。国破未清儿女债，髯荒尚笃死生新。袞师异日成追忆，算作传家付万金。

毒流魔掌全家毁，人似荒云燕乱飞，旅灯坐近黄梅雨，不为行人也湿衣。

清明泽国丹崖山遥祭乡先贤

离踪暂集海之涯，死傍南雷一念皆，直恐归时添白发，难忘今日祭丹崖，荐天热泪淋漓下，插地清香长幼排，相见时难又须别，草间深恨未驱豺。

浓云隐隐走春雷，道上红鹃今又开，吾辈长为亡命客，他乡权作祭忠台。

江心寺谒文文山祠堂

江流到此故回折，山势浮空欲动摇，双塔长悬星日月，孤臣独看寺云潮。生排万劫天仍墜，死近千年虏尚骄，屠郭洗街新梦过，伏碑无泪哭前朝。

层峦遥控水飞扬，不断钟声出上方，对此江城难默默，嗟公身手最堂堂，山曾变色谁之过？国尚褒忠祠已荒，漫续中兴何代事，可怜人鬼两凄惶！

八方烽火独登临，浮郭车樯漠漠深，海气黄残桑麦影，市灯红蚀士民心，已无牛酒祭三月，但见樗蒲挥万金，古佛不言鱼鸟散，可能入地与披襟。

脚踏飞尘鬓满沙，长年流转若为家，人因薄义忘柴市，我自扬帆到永嘉，槛外荒寒鸦泼墨，江心郁怒浪开花，临归得鉴衣冠影，一棹天青日未斜。

沙山塘新豆登盘（温岭县）

长在山阿与水边，岁时那得供灵前，今朝剥豆连心痛，记住无家第二年。（先慈最嗜鲜豆子）

自怜（又题每忆）

自怜一叶任西东，数口流离道路中，每忆沙山听暑雨，丈夫今尚泪痕红。

大龙湫歌 在雁荡山

六月十五日，我作雁宕游。天公先下三日雨，为我蓄势壮龙湫。晓发沙山雨，午饮白溪楼，晚宿净明钟，松巅淅沥尚未休，破明起床冲雨出，晓雀先我飞啁啾，嘲我壮不能杀贼，苦寻山水以为仇。跨过马鞍岭，溪石锐以稠，短者触膝高刺眸，胯下急湍泛洪波，而我掉臂深入不回头，水哉水哉已见天际流，颇似白布自空投浩浩荡荡纵不收，掷入潭底复倒抽，掣之者谁邈难求，有声隆隆风飕飕，使人屏息却立身伛偻，高二十丈阔二丈，石门之瀑逊其直而遁，雪窦之瀑无此巨且修，惜哉一水只供耳目谋，不洗江山旷古羞，五月兵溃一千里，遂使兽蹄鸟迹几欲遍神州，日暮山化红髑髅，如闻狂哭大号吐其喉，栖霞道士解得不？

东天目钟楼

无限苍茫故国情，钟声何急夜何清，自怜不是英雄手，独看松巅月怒明。危崖伸手摘星辰，不管凉霄露满身，一杵敲残家国梦，有谁想到听钟人。

八月十四夜作

空山俯仰夜何其，草树向黄河汉移，露重青天如涕泪，月明鸟鹊亦流离。一年空有家国梦，半世兼怜笔墨疲，曾说偏师捣海角，只今城郭渺红旗。

骨销神腐坐咨嗟，隐隐山灵耳语哗，地下阿娘同望月，乱余游子不归家。三更作伴虫相答，万里无云眼转花，白发桐棺烽火里，可堪一饼祭天涯。

星宿（又题看星）

密密松杉兀兀身，凉宵呼吸有兵尘，无声白露流芒角，星宿怒于下界人。

玲珑山遇雨

昨夜星辰象纬黄，鸡声惊旦出潘庄，身边急雨通天愤，马上新诗吊国殇，云树尚流兵火气，丁男莫管水田荒，是谁解得幽忧意，山色玲珑慰道旁。

宿寿昌大同镇

衰草长街满眼荒，布鞋冻结滑浓霜，三更来饮大同酒，不是边关月亦黄。

夜入新登城

晚过三溪口，星明地愈暗，菽影摇左右，叶大风中战，当时杀伐魂，隐隐如可见。初更入新登，四门灯火断，惨肃过行军，但闻履声乱，破路不容趾，颠蹶与人怨。廿一月上迟，城头刚露半，霜气接烧痕，黄如词客面，颓垣放烟花，废灶苞萝（玉米）绽，易步皆邱墩，城空何有店。浩劫忆夏五，寇来崇朝陷，长街不洗刀，杀人以为玩，至今腐磷多，天寒恻恻艳，远村一犬吠，行客浑身颤，我非小丈夫，勃然更按剑。

出昱岭关

石悍云荒路不平，万蝉号暑若通名，茆棚老妇当关坐，看是卖茶亦戍兵。萧萧病马独轮车，没有誓忘国与家，忽按心头天大怒，满山开遍白芝麻。

泊严东关

沙埠秋篷露化烟，数枝柳立废城边，山眠溪病星无力，月转深宵亦可怜。

桐君山夜眺（桐君山在桐庐县境富春江畔）

去时陟历万松间，该道清溪月送还，醒上高楼难着笔，夜潮如墨画残山。

遂昌道中

万树陈兵若可挥，溪流作鼓壮东归，天心怜有英雄梦，暂许青山乱突围。

萤火

风高露重亦飞行，比似繁星闪闪惊，辛苦草间怜力薄，痴红无奈到天明。

遂昌史可法祠

香花危时尚满城，祠堂上将本书生，官中看了梅花出，下马叩头泪更清。

中秋宿于潜

脱却芒鞋濯晚凉，行人草草此排场，三年三地看明月，一饭一茶思故乡，摇笔能驱兵马影，游丝为络鬓髯霜，秋虫更替全家泣，地下天涯分五方。

劫后桐庐

白昼入桐庐，凜然森鬼气，触目皆断垣，碎瓦堆满地，灌木三两丛，杙鸣声凄厉，寒鸦翔不下，野犬相舐戏。旋登府后山，荒秽阻步履，燥谷抽霜苗，曾积喂胡骑，上有大白杨，结构颇隐蔽，当时寇凭据，通电射火器，隔水望桐君，庙毁塔亦圯，忆者此山城，沿江最清丽，窗纳远峰秀，岸有画船系，垜墙围花光，檐柳绿含睇，一幅辋川图，户户含诗意。洒泪吊芜城，今来隔世异，闻之导者言，城陷在夏季，烈焰烧天空，倭刀试锋利，老弱成人彘，辄被残肢体，盛暑投池塘，秋凉又浮起，寇退民来归，吞声旧业理，汲水煮茶饭，往往触断臂，人膏着釜臑，入口知何味，叵奈八月间，剧战更莫比，一江争锁钥，此城遂全废，遗黎不敢归，鼠伏荒山里，夜深谁为守，空城尚不弃，数点桐油灯，寐寐兵与吏。

新登县灵隐洞长歌

何神凿此浑沌窍？何年天开此奥窔？深秋我来龙门镇，霜草风沙百里冒。攀扶上趋树纵横，苍藤龙怒乱啮帽，八搭麻鞋先作驱，灵运山贼我山盗。风过松子落，叶败不胜扫，山花自成春，历荒阴阳倒，云窦亏蔽诡境开，躯颅掷入天半窖，洞口秋阳弥望红，洞中岁岁痴雾草，山民伐竹为炬火，高擎先将四壁照，题名者谁墨尚新。道光初元客始到，乃知此洞荒落数百千万年，与图地志道篆丹书忽漏无名号。拊掌叱起白蝙蝠，翅鼓车轮作前导，仙禽雨粪积两肩，闻见所无皆画稿。世变仓皇劫火炽，此中自成一世界，履边琤琮广乐喧，头上嶙峋钟乳大，青红皂绿色色全，六道动静穷其态，宽广堪容十万人，窄处转身尚觉隘，我欲深入抉其秘，导者摇手从者戒，万一荒游窒息死，死不为国谁祭拜？须知洞中有洞数凡七，此犹浅尝十之一，当其狭折如衣带，尔身非蛇岂可穴？又当深泓横其前，尔身非蛙岂可跃？我闻其言只有低徊抚膺长叹息！吁嗟乎，江山显世仗人文，如何昭谏当时不见又不闻，霞客浪称善游者，亦复疏漏失其真，遂令腐儒弄笔墨，流传不

出新登门。吁嗟乎，庚桑善卷旧称乾坤双洞天下稀。双龙冰壶并推东南奇。今以例此乃觉彼哉微乎微。谁其好事燃爆竹，出洞但见新月初上鸦乱飞。谁更好事督我长歌勒以三十七洞天，发幽无如程篁墩，歌成掷笔东向坐，遥念胡马饮冰瀑，横流欲湿金华云。

夜泊青田

渔火相依泊水闾，山高天窄困星辰，披衣坐惜雄鸡苦，啼白篷霜醒几人？

赤城晚霞

三年旅梦唱刀环，弓月挂天只有闲，孤负离奇一幅画，半城霞火煮青山。

别天目

万叠松杉古寺前，连宵饯饮欲成泉，袈裟冠剑殷殷极，流水行人惘惘然。此去为乡应识我，重逢何世但凭天，书生心肝英雄泪，回首青山湿半边。

七过钓台

印水无声密誓留，生来祭拜死便休。松风浩浩回音大，私喜先生若点头。附伏篷窗对晚晴，台前子弟领深情，新霜去路绵绵白，云作羊裘送远行。

劫后过龙游

朝阳绚染几枝枫，漱水粼粼熨晓风，渡口莫提当日事，溪山面已不胜红。

宿徽州

事虽无成死不休，青山换葬少年头，何年唤起江天一，叱使星飞月倒流。

龙游（时方演剧）

子夜灯清玉树残，听歌人恐不胜寒，枣花帘外皆焦土，慎莫回头四面看。

山行

滩高石壮水声微，开谢芦花作蝶飞，十九山田沙土冻，每因菜石想人饥。新棉腊月未沾身，还说松云住幸民，山店日斜蒸豆粽，眼前谁是醉歌人？

渡海门至临海

栖山走陆白髯根，今夜何期出海门，大笑鱼龙重见面，漫哀猿鹤一招魂。中天星密霜初降，独客汗流浪自浑。此去南雷知渐近，要能露布檄千村。

维桑二首

千山万水辙重寻，记踏衙斋雪正深，扪腹未消正月饭，对天再掬小人心。痛无所补存豪想，恕不能言托苦吟，绝笑破家牛马走，尚矜霸气薄黄金。

维桑草乱入荒幽，人物无多阻上游，怜我痴心仍道路，谢公大义责春秋。西来特乞三年艾。此去当过五桂楼，肯负叮咛髯半白，门前浩荡箬溪流。

附：过泽国赠叔范及其流亡乡子弟（诸暨陈季侃）

忠义南雷民族光，丹崖羁客亦堂堂！五千自保越君子，一旅中兴夏少康。占得明夷犹待访，仇同时日与偕亡。海山尽是中华土，且把他乡作故乡。

冬夜

抚楫何人对此宵，一丝瘦影与风摇，肥霜搏出如秋月，浮地寒光欲浸腰。

题余（绍宋）摹归竹图

头上红灯注六韬，江山手障白云高，但能一节关忠爱，纸墨通灵梦亦劳。
烽火烛天砚海深，冰花摹出值千金，前朝今代何穷恨，中有孤儒耿耿心。
墨泪淋漓不自持，劫余九首祭忠诗，江南恸哭人才尽，想见荒庵烂醉时。
落纸恢奇压晚明，峣峣风骨喻其清，后三百载谁为友，剩个诗髯踏月行。
叠叠湖波“万古愁”，朱家剩水路家楼，无能一夜长千尺，截作洞箫吹上头。
或贾或僧或酒徒，英雄一一老江湖，江湖结局是萍散，但看无根墨竹图。
此是诗狂亦酒狂，惜难挽得硬弓强，高天短笠横刀死，绝胜太湖醉一场。
独能忠愤动人间，几见书生杀敌还，我是亭林应痛哭，恨无义帜出昆山。

登华顶太白楼（华顶为天台山主峰）

太白楼吞大野宽，枯茆一丈结檐端，听他猿鸟愁何极，对此江山弃亦难。誓墓人来云脚散，拜经僧死石头残，登临便作南雷想，浩荡晨曦意最丹。

青峰出没海涵浑，直北黄云胡马屯，俗骨还容升上界，山高每易见中原。新霜欲换遗民帽，晞发难招异代魂，独对西风歌猛士，伶仃洋接石亭村。（张苍水屯兵处）

国清寺隋梅

历唐经宋代纷更，草腐雷塘树尚名，游者自叹此寺古，我来独惜数花清。凭栏仰视天何语，激石西流水有声。可许遗山起地下，当时隐痛眼前明。

镰月

镰月剖天白露深，露中萤火有升沉，观星不信天无眼，注视流人默默心。

天目山大树王歌

天目杉见水经注，五抱十抱多无数，涌绿成潮自为海，不云而雨不风怒。参天更有大树王，下截地维龙作螭，一枝阳回天地春，一叶落知江东素，东枝曾送徐福舟，北枝亲见蒙恬戍，西海诸邦曾内贡，南服渐成黄金土，俯视神州事如猬，太子神僧但墓碑。鸿荒代远邈难稽，自有此山有此树。我幼喜读庾信赋，我壮爱慕将军武，我生适逢国步蹇，疆河日削遭侵海，故乡杨柳非不好，翁仲断送蔡京误，髡苇代械斗夷儿，贺船击出生死路，自来兹山发悲歌，晨昏递换易寒暑，梦中时闻霹雳催，酒醉每见婆娑舞，怪髯曷勿访丈人，迟髯告以史全部。深秋发兴理行滕，先期饬励济胜具。同行僧吏皆健者，吾宗伉俪亦善步。……庙堂野草野后人论，于髯（于右任）之墨施髯句。

车轮（十首录五）

梦转车轮月转襟，空怜浩荡载诗心，一溪无水无声色，不抵油灯半寸深。
猪栏鸡栅路三叉，参佐清谈酒与茶，窥户都关天下计，红蓝青布白棉花。
蛮刀帕首万峰顶，秣马征兵数县间，夜夜红旗飞捷报，月明铙吹梦中还。
黄金粥爵稻粮贱，鸡犬升仙硕鼠繁，便作芜城高处望，东南莽莽客何言。